



ISTITUT CULTURAL LADIN
Majon di Fascegn

Sèn Jan, ai 4 de jugn 2020

COMUNICAT STAMPA

**Museo ladin de Fascia
Istitut Culturâl Ladin**

“LA VIVANA E L CIAN” NEVA INSTALAZION MULTIMEDIÈLA

Ai 10 de jugn enche l Museo Ladin de Fascia l’averjarà la “Stues de la Memoria”, dò aer cognù serèr per la pandemia e dò i lurieres programé de netijia e de adatament a la normatives de prevenzion. Per dut l meis de jugn per l biliet de entrèda vegnarà aplicà la **tarifa unica spezièla de 1,00 euro** jà adotèda dal sistem museal trentin, per ge jir encontra dantaldut a la jent del post, endèna che se speta de “pontèr via” co la sajón da d’istà.

De gra a chesta oportunità la jent de Fascia arà l met de descorig la più bela “neva” de la sajón da d’istà 2020, la **neva instalazion multimedièla** enjignèda te l’ultima sala del Museo, olache l publich podarà viver n moment de forta emozion co la proiezion sun maxischerm de n picol film en mondura, zentrà su na contia tradizionèla veiora, “**La vivana e l cian**”, realisà co la partezipazion de atores del post en colaborazion con “490 Studie” de Trent per la regia de Filip Milenkovic.

A fin de la vijita, te la sala dedichèda a la Modernità, l vijitador l podarà donca trèr n saut te la più arcaica tradizion de Fascia, fata de sons, inomes e divinitèdes misterioses, che les ciapa endò vita co l’aiut de la moderna tecnologies audiovisives e del spirit creatif di artisç de anché, per ge tramanèr a l’om de anchecondi la eterna sugestions del mit.

Con chesta scomenzadiva l’Istitut ladin l vel dèr sie contribut a didèr dò la vita sozièla restèda ceta enscin ades e enche l’atività del setor turistich, spervajo che te Fascia desche utró l’é debeseegn de tegnir sù soraldut la cultura, l’identità e la calità de l’oferta che n teritorie esclusif desche chel nosc l met a la leta di vijitadores. Per chesta rejon, a la pruma proiezion vegnarà envià i responsaboi e l personal de l’APT, i raprezentanc di operadores economics e di media, estra che i esponenc di enc locai.

Canche se averjarà endò l Museo, la persones enteressèdes a condivider chesta esperienza les podarà se prenotèr per tor pèrt a la “**vijites vidèdes**” che a scomenzèr da lunesc ai 15 les vegnarà endrezèdes per **gropes de 8 persones**, aldò de oraries che vegnarà fac a saer e tel pien respet de la normes de segurezza pervedudes per l’azess del publich.

L prum Ghest che l varearà la sèva del Museo Ladin te na vijita individuèla l ciaparà en don na copia del volum prestigios *Cultura materiale, religiosità e tradizioni in Val di Fassa*, publicà da Priuli & Verlucca, co la bela fotografies de Francesco Gioana.

(FC/ar/mc)